



Zinedine Zidane'er jabaso Luca
Algeria nungi asayatsü

Portugal-i Palestinian
state ka agizüksü

Kohima DC-i traffic advisory metetdaksür

Dimapur, September 20, 2025 (TYO): Kohima Deputy Commissioner B. Henok Buchem-i September 21, 2025 atema traffic advisory ka agütsüogo.

Deobar nikongdang 1:00 ako nungi aonung 7:00 ako tashi Razhü Point Junction nungi IGAR

(North) aser D-Block ajanga Phoolbari Junction tashi garitem National Highway-2 ajanga senzütsü ta Kohima DC-i ashi.

Razhü Point Junction nungi NST ajanga Phoolbari Junction leni yoktsü anungji public-i tashi angatsü mepishir ta DC-isa metetdaksüogo.

US-i H-1B Visa fee ajungketba ajanga timtem ajurutsü: MHA

New Delhi, September 20, 2025 (Agencies): United States-i H-1B visa fee teimba akümba ajanga kibongtem asoshi timtem bentsür arutsü ta Ministry of External Affairs-i Honibarnü metetdaksüogo.

India sorkari visa fee atuba ajanga timtem ajurubatem asadangdar aser US ketdangsürtemi iba onük ya agizüka inyaksü imlar ta MHA-i ashi.

United States-i bendangterem aruba azüoktsü atema US President Donald Trump-i Hokolbarnü proclamation ka nung sign süogo.

Iba proclamation nung H-1B visa applicants dang kümshia \$100,000 (over Rs 88 lakh) fee agitsü lateta lir.

Iba visa fee ya \$2,000 nungi \$5,000 tashi lir aser ibaji employer size aser tanga jenjangtem nung ajemdaker agitsü.

"Linüki aruba nisungtemji mapa shia metetertem aser American workers memelentsüpur asütsü atema visa fee atur. US-i mapa inyakterem nüngdaker, mapa tajung inyakterem nüngdaker aser iba inyakyim ajanga ibaji ataloktsü" ta Donald Trump-i ashi.

"US H1B visa program nung tenokdangba aliba osangtem sorkari nguogo. Iba ajanga

tetsükdaksü ajurutsü aliba ajak Indian industry dena sendaktepa alirtemi shisadangdar" ta Ministry of External Affairs-isa metetdaksü.

"US nung visa inyakyim kanga dang tim mesüi amshibaji H-1B non-immigrant visa program ya lir" ta White House staff secretary Will Scharf-i ashi.

"Iba proclamation ajanga company temi H-1B applicants yaritsü atema fee \$100,000 agi ajungketer. Iba ajanga parnoki anir aruba nisungtemji highly skilled asütsü aser American workers-i melenzüksü makoktsü" ta Scharf-isa ashi.

H-1B visa holders 71% tashi India nunger lir aser tech industry nung high-skilled workers 3,00,000 shi H-1B visas nung lir. Indian tech workers aser kaketshir aika H-1B visa nung dang ajemdaker lir.

H-1B visas ajanga company temi specialised skills aliba foreign workers US nung mapa inyaksü atema yarir. Specialised skills nung scientists, engineers, aser computer programmers dena lir aser H-1B visa ya küm asem atema agütsür aser nüngdakra küm 6 tashi atsülanger.

US-i kümshia lottery system ajanga H-1B visas 85,000 agütsür aser iba nung India nunger teimba angur.

Kin 5 CoRRP-i Oct 1 nungi district pungu mokdangtsü



Five Tribes Committee on Review Reservation Policy (CoRRP) ketdangsertemi osangbenertem den jempiba noksa angur.

Kohima, September 20, 2025 (TYO): Five Tribes Committee on Review Reservation Policy (CoRRP) ajanga district 8 nung mapang telatet makai mokdangtsü metetdaksüogo.

Nagaland nung reservation policy meyipa reprangshitsü atema commission tentettsü rongshitsü atema küm 5 ajanga tentetba CoRRP-i iba mokdang ayongzüker.

Tanü CoRRP-i Angami, Ao, Lotha, Rengma aser Sema kin 5 nungi tongti teloktem den senden ka amen.

"Onoki sorkar dangi shidi ka zülutsü lemtetogo. Anogo 10

tsüngda commission tentettsü atema mapang züngzüksütsü. Onoki joko ata meliteter. Sorkari ita ka tentettsü atema commission ka tentettsü ta ashi saka anogo 100 jungogo" ta CoRRP convener Tesinlo Semy-i ashi.

Sorkari anogo 10 tsüngda commission metentetra district ajungtsü mokdangtsü. Kin 5 aliba district 5 nung October 1, 2025 nungi onoki mokdang tenzüksü ta Semy-i ashi.

State cabinet-i June 12 nü commission tentettsü mulunga agizük aser tanü anogo 100 jungogo ta Member Secretary G

K Zhimomi-ia ashi.

"Sorkari civil societies nungi nübotem aginü saka ibaji onoki tetenzük nungi magizük. Tanü tashi nung anogo 100 jungogo saka sorkari kechi atsülanger parnoki dang metet" ta Zhimomi-i ashi.

Onoki iba atema takhangba magütsü saka June 3, 2025 nü Deputy Chief Minister, Y Patton menden ser state sorkar dang senden amendang iba ya lemtet ta paisa ashi.

Sorkari onok dang ita ka tsüngda commission ka tentettsü nangzük aser tanü anogo 100 jungogo ta Zhimomi-isa shisem.

Manipur sorkari Assam Rifles amakba aitsür; teyari agütsür



Imphal, September 20, 2025 (Agencies): September 19, 2025 nü 33 Assam Rifles amakba aitsür ta Manipur sorkari metetdaksüogo.

Iba tatalokba nung AR sepai ana khaset aser nisung pungu yiru.

Iba ya lapi mapa ka lir aser tasür kibongtem den mangyim lemsateper. Sorkari yirua alirtem tekaraba nung taneptsü angutsü sarasademtsür ta Manipur sorkari metetdaksü.

Sepaitem nem akhüm tetushi agüja sorkari tasür sepai ana kibongtem nem Rs 5 lakh aser yirua alir nem Rs 2 lakh teyari agütsütsü nangzükogo.

33 Assam Rifles amakba ya Manipur kübok tesem balala nungi nisungtemi aitsür.

Bishnupur district kübok

Nambol Sabal Leikai nung sepaitem amakba atema Honibarnep nübortemi iba lendong atalokba tesem nung lungkak aitogo.

Nübortemi pei pei kin sobutsü agir lendong atalokdak adenshi aser parnoki yimyim ayima aser placards amer lungkak ait.

Iba sentong ya tetsürtemi anir agi aser nisung alidak injang amshiba atema mepelaba den security forces amakba anentsü ayimten.

Hokolbar nikongdang AR convoy ka amakdang Naib Subedar Shyam Gurung aser Rifleman Ranjit Singh Kashyap na khaset.

Manipur kübok Imphal Valley nung denotified area ka nung mejangjatetba nisungtemi Assam

Rifles column ka amak. Iba tesem nung Armed Forces (Special Powers) Act (AFSPA) ozüng mali ta defence sangdong ka nung metetdaksü.

"Iba mapang Assam Rifles sepai anati taküm bendanga agütsü aser sepai pungu yiru. Kiralongrartem aputsü atema search operations agidar" ta sangdong nungsa ashi.

"Telungpur pezü pungu shi kati onok dak injang khaloktsü. Onoki civilian tem lendongi meyoktsü atema idangjisa injang mekhaloktsü" ta yirua alir sepai N Nongthon-i ashi.

Churachandpur nung amenoka aliba telok- Kuki Zo Council-ia iba tatalokba aitsüogo. Public alidak paramilitary forces amakba aitsür ta parnoki ashi.

Pagala Pahar masü Tsiedukhru Range ta amshitsü nenshir

Dimapur, September 20, 2025 (TYO): Chümoukedima lushi kübok Tsiedukhru Range dang "Pagala Pahar" ta majatsüla aser iba nüngja amshir dak sobaliba inyakyim kübok tasüngdangba mesüra temerenshi alitsü ta Chümoukedima Village Council (CVC)-i tekümdangtsü osang ka metetdaksüogo.

"Onoki aiben Tsiedukhru Range dang Pagala Pahar ta majatsü atema yimjak nung jangjatsüogo saka media houses, social media users, aser YouTubers-i iba tenüng tamajung amshir" ta CVC chairman Razouvotuo Chatsu aser gaon bura (GB) Khriezo Shüya nati sangdong ka nung ashi.

"Akhidang nungi Tsiedukhru

Range ya tongtipang süa benshia arur aser iba tesem ya ozü yimtsüng tar nunger otsütem den sendaktepa lir. Anungji Chümoukedima aser yimertem asoshi iba tzükong ya kanga tongtipang lir. Iba ama senmang süa benshiba tesem ka nem nüngja tamajung ka agütsüba ya magizüker aser iba ya ozü yimtsüng putiotsü mezüngmeshiba inyakyim ka lir" ta Chümoukedima yimsüsürtemi ashi.

Tanü nungi nisung, telok mesüra agency kari danga Tsiedukhru Range dang "Pagala Pahar" ta amshiba putetra sobaliba inyakyim kübok teinyaktsü tim inyaksü ta Chümoukedima Village Council (CVC)-i tekümdangtsü metetdaksü.



Nagaland Directorate Ministerial Services Association (NDMSA) Executive aser Editorial Board den NDMSA pioneers Medoselhou Keretsu, Rokowhelie Peseyie, Imti Ao aser Ruguolie Haralu nunger tangokba noksa nung angur.

Gari tulutemi Kezoma-Kidima lenmang aser pipeline raksatsü

Dimapur, Rongjui/September 20 (TYO): Deputy Commissioner Kohima, B. Henok Buchem den Revenue Officer Kohima, Kevingoto Kulnu, Extra Assistant Commissioner Kezocha, Limakumla Pongener, Executive Engineer PHED Rural Kohima, Er. Kedo Punyü, DDMO NSDMA Kohima, Thejangulie Zao, SDO PHED, aser tanga ketdangsürtemi September 19 nü Kezoma yimtsüng semdanga Village Council, WATSAN committee aser yimtsüng nung tanga lenirtem den tzü pipeline raksar aliba asadanga liasü.

Senden amenba mapang Kezoma Village Council-i ashiba agi, Phesama nung NH-02 raksaba sülen Manipur-i aoba garitem ajak Kezoma-Kidima lenmang nung senzü tenzük. Gari aika senzüba den tzünglu kanga aruba ajanga lenmang kanga mejungi aküm, aser kidanger yimtsüng indang tzü pipeline raksatsü aser iba ajanga yimdaklirtem timtemtepa arudar.

Lenmang divert sür amshiba mapang yimtsüng balalai teka amteper inyakba atema Deputy Commissioner-i parnok dang kanga pelaba lemsatep. Paisa, Kezoma-

Kidima lenmang yanglushitsü atema NHIDCL-i senotsü agütsü aser state agency temi maparen benoka inyaksü, ta ashi.

Kasa mapang nung tzü pipe line raksar aliba ya District Administration, PHED, aser NSDMA nunger longjemer yanglushitsü, ta metetdaksü. DC-isa, iba inyakyim atema PHED Rural Kohima aser NSDMA nati teyari agütsüba atema kanga pelaba lemsatep.

Maneni Executive Engineer PHED Rural Kohima-i, maparen September 22 nü tenzüksü aser anogo 15 tsüngda tembanga inyaksü imlar ta ashi.

Chümoukedima Village Council-i ken o jangjashitsür

Dimapur, Rongjui/September 20 (TYO): Tsiedukhru Range dang "Pagala Pahar," ta majatsü atema aiben yimjak nung metongshija aruogo, ajisüaka media houses, social media amshirtem aser YouTube temi iba nüngia maneni amshiba ngua tezü adangba Chümoukedima Village Council-i metetdaksüogo.

Tsiedukhru Range ya

Chümoukedima aser iba tesem nung alirtem atemba sobaliba aser puti otsü tsütsü kanga tongtibang lir, kechiyong iba tesem ya yimtsüng tarnunger otsü aser nüngtugu nisungtem den sendaktepa lir. Kanga dang metsüngareta amshiba tesem ka melen tanga nüngja ka agüja (slang term) amshiba ya tezüdangtsüka dang masü saka asaa yimtsüng puti otsü jenjang

meketi kümdaktsütsü atema lir, ta kasa sangdong ajanga metetdaksü.

Anungji, kija, telok mesüra agency shirnokisa Tsiedukhru Range dang "Pagala Pahar" ta jadri parnok anema temzüng özüng dak ajemdaker mesüra sobaliba inyakyim dak ajemdaker jenjang tapet agitsü, ta Chümoukedima Village Council-isa metetdaksüogo.

SON-i ayongzüka Youth Summit 2025 agiogo



Dimapur, Rongjui/September 20 (TYO): Special Olympics Bharat-Nagaland (SON) aser St. Mary's Montessori Higher Secondary School (SMMHSS) la longjemer Youth Summit 2025 - Nagaland ayongzüka agiogo, kong special athletes, tesayur, tsürapur aser lanur lenirtemi shilem agia liasü.

Sentong nung tongti tejaoker SDO (Civil), Wiridin-i Deputy Commissioner tenüng nung shilem agi, aser pai SON takoktem atema tenüngsang agütsüba den parnoki maneni nongita yaritsü tenangzüka agütsü aser lokti dang lokti-i sentokertem tenzüksü atema ajemalushitsü ayongzüka liasü.

SOB National Office nungi shisalen sayur Aditi aser Yashika (intellectual disability aliba lanur lenir) nati World Games aser asayartemi aniba inyakyimtem indang metetdakja sentong nung shilem agirtem ajungmeso aser tesayur aser tsürapurtem den roundtable sentong ka agia liasü.

Tenatisa, tebendang makai amshiba ya charity masü saka justice lir ta ashiba den, Yashika-i taküm nung ajangshia arubatem ajak ajanga maongka dang agütsüra iba ajanga sempettem salatsür ta kuli agütsür, ta ashi.

Sentong nungsa athlete lenir asem, mentor asem aser taruba NYIC & NAIC (Online National training programs) atema lanur lenir asem shima liasü. Ajisüaka Kohima summit bo tetsükdaksü kar aliba ajanga thia liasü.

SON-isa, Nagaland nungi special athlete tem shirnoki National aser International Games nung medal 130 dak tema ngua liasü parnok takok indang nemadanga lemsatep. State nungi asayartemi state nungi mainstream asayartem dang nungi tajungba shilem agia liasü. Ajisüaka pandemic sülen travel reimbursement maliba ajanga parnok tejangraba aser sempet liaka National

championships aser sentongtem nung shilem magiteti arudar, ta metetdaksü.

Tangar dang nungi teyari tali nüngdaka aliba tanurtem nem kishi lapoktsüba atema SMMHSS dang kanga pelaba lemsatepba mapang SON-i, Australia nung 2013 Special Olympics Asia-Pacific Games mapang India tenüng nungi Nagaland nungi kaketshir anati shilem agiba bilemtetshia jembia liasü.

SON Area Director-i, SOB tir Dr. Mallika Nadda, SOB nungi shisalen sayur, sentong nung shilem agiba school tem, NGO tem, kibongtem aser temeimertem shirnoki tenla tajung agütsüba den iba sentong nongita yariogo parnok ajak dang kanga pelaba lemsatepba den SON team shirnoki 2009 küm nungi honorarium/itasen magi Special Olympics Mission atema inyaka arudar parnok dang kanga pelaba lemsatepba liasü.

EPFO aser NHRA na longjemer sensitization sentong ka ayonger

Dimapur, Rongjui/September 20 (TYO): Employees Provident Fund Organization (EPFO) Special State Office, Dimapur aser Nagaland Hotel & Restaurant Association (NHRA) na longjemer September 22 nü Employees Provident Fund (EPF) dak sendakba nung sensitization sentong ka ayonger.

Iba sentong ya Hotel

Saramati nung 2 ako nungi tenzük agitsü aser shisalen sayurji Samuel Das, Regional P F Commissioner, EPFO Special State Office, Dimapur asütsü.

Iba dak sendakba nung Dimapur District kübok Hotel & Restaurant kibur/proprietors/administrators ajak dang iba sensitization sentong nung jangrabangra arua shilem agitsü mepeshia metetdaksüogo.

Clef Music Awards nung Abiogenesis-i Best Rock Regional Song naroküm angu



Dimapur, Rongjui/September 20 (TYO): Nagaland nungi folk fusion band Abiogenesis-i, 5buba Clef Music Awards nung Best Rock Regional Song Award nguogo.

Iba naroküm ya Tales in Harmony kensep nungi "Asen Lima" ken atema ngua liasü. Naroküm agütsüba sentong ya September 19 nü Westin Garden City, Mumbai (Goregaon) nung agia liasü.

Abiogenesis tenüng nung iba naroküm ya Mesensen-i agizük, koba Nagaland nung kentenba lokti tentet atema otsüsütsüka aser nemadangtsü mapang ka liasü.

Clef Music Awards ya Indiantelevision.com's ITV Group-India-i ayongzüka küm

shia agir, koba ajanga Indian music industry nung kentenba yimya balala nung temaba jenjang tongtetertem tushir. Taküm iba sentong ajanga 2024 küm May 1 nü nungi 2025 küm June 30 tashi nung sayaba kentem tushio.

Taküm iba sentong nung Tips Music, Universal Music, Warner Music, aser Believe India nunger amala temaba jenjang nung aliba music label temi shilem agiogo aser iba ajanga iba sentong jenjang tajungba kümdaktsür.

September 19 nü sentong ya 6:30 ako nung tenzük aser networking dinner ka agia tembanga liasü. Sentong nung India nunger nüngtugu kentenerem aikati shilem agia liasü.

Kohima DC-i NH-29 semdang

Dimapur, Rongjui/September 20 (TYO): September 19 nü Kohima Deputy Commissioner B. Henok Buchem-i anir ketdangsürtem team kati Kohima aser Phek districts na sendaktepba NH-29 semdangogo.

Lenmang asadanga telok nung Revenue Officer Kohima Kevingoto Kulnu, Extra Assistant Commissioner Kezocha Limakumla Pongener, PHED Rural Kohima Executive Engineer & SDO, DDMO Kohima (NSDMA), NHIDCL nungi lenirtem, EPC contractor, aser tanga ketdangsürtem densema liasü.

Lenmang asadanga aoba mapang Deputy Commissioner-i, lenmang kanga mejungi aliba ngua kanga tezü adangba aser süoki ia bilemba lemsatep aser contractor temi mapang shitak nung lenmang anepalua meyanglushiba atema parnok aija liasü.

NH-29 ya Phek, Meluri, Zunheboto, aser Kiphire nung alirtem atema state yimtiba

Kohima den sendakteptsü asoshi kanga tongtibang lenmang ta shia DC-i, NHIDCL aser EPC contractor tem dang lenmang tangsa tang yanglushitsütsü tetuyuba agüja liasü.

Ketdangsür tem yagi tongtibang tesemtem aika semdangogo, kong KM 22+536 aser KM 22+834 nung ali anenoka ia aliba tesem aser KM 23+665 nung apu raksar aliba densema liasü. Contractor tem dang lenmang tamajungba küma meyoxtsü atema jenjang tapet agitsü, lenmang takaratiba nung merektetsütsü aser NH-29 nung raksar aliba pavement tem yanglushitsütsü tetuyuba agütsüogo.

Contractor temi ali anenoka ia aliba tesemtem nung October 3 nü tashi nungbo nüburtem kümzüka toktsütsü atema jenjang agitsü ta tenangzüka agütsüogo, aser apur raksar aliba ya yanglushitsü atema project scope nung enoktsü asoshi maparen benoka inyaksangshiba agency dangi abentsü benoka liasü.

India atema tsükchir tulubaji tangar dak metalokba ya lir: PM Modi



September 20, 2025 nü Bhavnagar, Gujarat nung Ato kilonser, Narendra Modi-i road show ka ayongzüka agidang tangokba noksa nung angur.

New Delhi, Rongjui/September 20 (Agencies): Honibarnü Ato kilonser, Narendra Modi-i tangar dak memetaloktsü ayongzüka 'India atema tsükchir tulutibaji bendang linüktem dak metalokba ya lir', ta metetdaksü.

Ato kilonser Modi-isa, India nung rong yangluba nungi tenzüka semiconductor chips yangluba densema ajak yanglutsüla, ta ayongzü.

Gujarat kübok Bhavnagar nung 'Samudra se Samruddhi' sentong nung pai sen crore 34,200 jenjang project tasen

tenzüksüba den project tasen aika semzüksüogo.

Iba sentong nung jembidang pai, "Atangji nungbo India atema tsükchir tulu mali. India atema tsükchirji tanga linüktem dak metalokba ya lir. Asenoki tangar dak metalokba ya tamakok ngudaktsüsüla. Asenoki kodaka tangar dak metalokdir yamaji tamakok angubajia tuluba asütsü ta asenoki angatettsüla," ta ashi.

"Chips nungi rong yangluba tashi asenoki ajak yanglutsüla. Yimjung alitsü, tashi itta alitsü aser rongsen alitsü atema alima nung nütsüng teimba aliba linüki

(India) tangar dak memetaloki pei sasa litettsüla," ta pai metetdaksü.

Tanga linüktem dak metalokba dak sendakba nung Modi-i, "Alima tesem balala nungi rong ajanga osettsüset bener arutsü atema India-i foreign company ka nem küm shia sen 6 lakh crore agütsür. Ibaji asen defence budget den kasa lir," ta metetdaksü.

Paisa, küm 50 tejaken asen linüki shishilembatsü atema amshiba rong shilem 40 bo linük nung yangluba rong liasü, saka tangbo shilem 5 dang kümogo, ta ashi.

Delhi police-i pistol aser temesepba mozü bena alir nisung 70 apu

New Delhi, Rongjui/September 20 (Agencies): Delhi police-i southeast Delhi tesem balala nung prangpong, temesepba mozü, yi aser auyaba oset aika den nisung 70 puogo, ta Honibarnü Delhi police-i metetdaksü.

'Operation Aaghat' kübok Delhi police-i Hokolbarnü tesem balala mita aoba mapang nung country-made pistol 14, sophisticated pistol ka, cartridges 24 aser kotari 16 apu; iba dak sendakba nung nisung 28 puogo, ta police-i metetdaksü.

Deputy Commissioner of Police (Southeast), Hemant Tiwari-i, "Operation Aaghat ya nüburtem kümzüka ayutsü, ozüing alema inyakba mapatem nokdangtsü, police tashi itshitsü aser emergency mapang inyaksangshiba tajungba

akümtsü nükjidong nung renemba asalentong ka lir," ta metetdaksü.

"Iba operation kübok temesepba mozü dak sendakba nung nisung 9 apu. Parnok ket nungi ganja touzük seret 5.985, heroin gram 51, MDMA gram 54 aser motorcycle ka puogo," ta paisa metetdaksü.

Police ketdangsertemi ashiba agi, ozüing alema inyakba mapatem nokdangtsü atema dang masü saka ozüing alema inyaker tasenpurtem nokdangtsü aser police aliba nüburtem nem metetdaksütsü nükjidong nung iba operation agir.


Iba operation kübok police-i patrolling senzür, intelligence ajanga temelung melemi alirtem maitsü jangjar aser 'high-risk areas' nung amalitepa inyaker. Police-isa nüburtem danga

melung malemtsüsa aliba nisungtem metetra police nem item ama osangji metetdakjang, ibaji ajanga police aser nüburtem tsüngda tamang ano taliba katettsü, ta metetdaksüogo.

Operation mapang nungsa ozüngi memelaba yi quarter 6,338 apu aser iba dak sendakba nung nisung 13 puogo. Police-isa sen asayar nisung 13 den parnok ket nungi sen 78,350 apu.

Police-isa auyaba phone asem aser motorcycle ana apu, aser iba dak sendakba nung nisung pongu puogo, ta Deputy Commissioner of Police (DCP)-i metetdaksü.

Iba dak alia Narcotic Drugs and Psychotropic Substances (NDPS) Act kübok ken o ka nung temelung melemi nisung ana puogo.



September 20, 2025 nü Ranchi nung 'Adivasi Kurmi Samaj' nung züngsemtemi Scheduled Tribe jenjang meshia Muri railway station nung longkak aita jajadang tangokba noksa nung angur.

Kerala nung tekolok achiba tashidak ka ajanga nisung 19 süogo

New Delhi, September 20 (Agencies): Kerala nung doctor temi tekolok dak sendakba tashidak ka indang t e k ü m d a n g t s ü metetdaksüogo.

Taküm küm tenzüker tang tashi nung tekolok achiba mesen ajanga adokdaksüba tashidakji nisung 72 dak putetogo aser tashi nung nisung 19 bo süadokogo.

Yaküm-a iba tashidak ya nisung 36 dak puteta liasü aser nisung 9 asü. Takümbo anasü agi tali iba tashidak puteter.

Aster IMMS, Calicut nung Critical Care Medicine Director, Dr. Anoop Kumar-i, "Mezüngbuba nung, 'meningoencephalitis' tetezü tekolok aser meyibanga aliba nung 'infection' mashie asütsü akok aser iba dangji meninges ta ajar," ta metetdaksü.

Dr. Anoop Kumar-isa, "Teti agia bacteria aser virus ajanga infection südaktsür, fungus mesüra amoeba agi infection asübabo kanga ajemer. Kodang Naegleria fowleri ta ajaba amoeba agi infect südir iba dangji primary amoebic meningoencephalitis (PAM) ta ajar. Iba dang ya 'tekolok achiba amoeba' taka ajar, kechiyong ibaji ajanga tekolok kanga mejungi raksatsür. Kodang iba jagi infect südir nisung ka süadoktsüji shilem 90 dak tali lir", ta metetdaksü.

Fortis Hospital (Vasant Kunj) nung Department of

Neurology Principal Director, Prof (Dr) Kameshwar Prasad-i, "Iba ya tekolok telungi aiba sülen waakdaksür, aser ibaji ajanga tekolak menüdaktsür, saaktsür, temang metar, terok mesaker aser bacterial infections adokdaksür. Shirangerji anogo ishika tsüngda süchia aotsü akok, mozü agi kanga junga mapa meinyaker, ibayongji shirangertem mapang tatsüka tsüngda süadoker," ta metetdaksü.

Iba infection ya tzü temerük ajanga menateper.

Health ketdangsertemi ashiba agi, tzübo, awatsüng aser swimming pools nung 'amoeba' ji alir. Tzüji ajemba agi meshirangdaksür saka tzüji teni ajanga tura mesenji melamela tekoloki aotsü akok.

Kerala kübok Kozhikode nunga iba tashidak agi asür arrshi küm 9 tetsür chanu ka tetsüi, "Ozü jala süadokogo, ta ni mamangteter. Ozü jala dak komaser iba tashidak mena'ar health ketdangsertemia meshiteter," ta metetdaksü.

Kerala nung mezüing PAM ya 2016 küm puteta liasü aser iba küm nungjagi tenzüka küm shia nisung ka-ana dak iba tashidak putet aser ajakji süadok.

1962 küm nungi tenzüka alima nung nisung 488 dak dang iba tashidak putetba jangjaogo.

Talisa US, Pakistan aser Australia nung teimba puteta liasü aser shilem 95 bo süadok.

FORM NO. 14
[See Regulation 33(2)]

OFFICE OF THE RECOVERY OFFICER- I/II
DEBTS RECOVERY TRIBUNAL, GUWAHATI

Suwarna Bhawan, House No. 12, New Town Path,
Near Hanuman Mandir, G.S. Road, Ulubari, Guwahati- 781007 (Assam)

DEMAND NOTICE

Recovery of Debts & Bankruptcy Act, 1993 nung Sections 25 nungi 28 tashi aser Income Tax Act, 1961 nung Second Schedule kübok Rule 2 nung ajemdaker notice agütsür.

RC / 321 / 2024

CANARA BANK

-Versus-

M/S. DIMAPUR FANCY FURNITURE UNIT

To,

(CD 1) M/S. DIMAPUR FANCY FURNITURE UNIT, Proprietorship Firm Represented by Pintu Kumar Saha, Lhomithi Colony, Opposite Sub Urban Police Station, Dimapur, Nagaland- 797112

(CD 2) MR. PINTU KUMAR SAHA, Son of Parimal Saha, Power House Colony, Burma Camp, Dimapur, Nagaland- 797112

(CD 3) SMT. BABY NATH, Care of Pradip Nath, Preeti Maruti Works, Khermahal Colony. Also at Rainbow Cottage, Notunbosti, Dimapur, Circular Road Dimapur, Nagaland- 797112.

OA/321/2022 nung DEBTS RECOVERY TRIBUNAL, GUWAHATI Presiding Officer-i tuyuba nung ajemdaker Recovery Certificate nung aliba ama Rs. 31,82,851.73 (Rupees Thirty One Lakhs Eighty Two Thousands Eight Hundred Fifty One and Paise Seventy Three only) den pendentellite aser 01.06.2022 anogo nungi tenzüka sentsüh mouma tashi ita shia @ 14.50 % Compound Interest aser costs Rs. 34,255/- (Rupees Thirty Four Thousands Two Hundred Fifty Five only) na (Jointly and Severally / Fully / Limited) anema lir.

(1) Recovery Certificate nung aliba sentsüh: Rs. 31,82,851.73

(2) 01.06.2022 nungi 05.12.2024 tashi interests @ 14.50 %Rs. 11,60,737.80

(3) Costs Rs. 34,255.00

Rs. 43,77,844.53

2. Iba notice agütsüba sülen anogo 15 tsüngda tekalen shia aliba senji agüjang ta nü dang tuyur, mesüra Recovery of Debts Due to Banks and Financial Institutions Act, 1993 aser Rules nung ajemdaker sentsüh alangzüksü atema inyaksangshitsü.

3. Taruba ken o angadangtsü anogo matongdangsa affidavit ka nung nü kiojen sangdongang ta nü dang tuyur.

4. Maneni ken o angadangtsü atema 08.10.2025 anogo nung anepdang 10:30 ako nung tsünglanglen sign süa alir matsüngdangi arung ta tuyur.

5. Tekalen shia aliba sen dak alia nai item ya-a agütsütsüsa akümtsü:

(a) Certificate notice agütsüba/ execution proceedings mapang nungi tenzüka sen tetemlok.

(b) Iba notice aser warrant agütsüba den külemi sentsüh alangzüksü atema inyaksangshidang indokba costs, charges aser expenses ajak agütsütsü.

Iba anogo: 22.07.2025 nung tsünglanglen kü meyongnem aser Tribunal seal agütsür.

RECOVERY OFFICER-I
DEBTS RECOVERY TRIBUNAL, GUWAHATI



TIR YIMYIM YIMOBILEM (EDITRIAL)

DIMAPUR SUNDAY, SEPTEMBER (RONGJUI) 21, 2025

Tsüngrem anguba taochi

Laishiba nung Tsüngremi moatsüba nisungtem tenüng shia aliba rongnung Tsüngremi temulungkanga lemtetba nisungji Yob liasü. Pa kanga takar, tetemjen aser teindang nisung ka liasü. Yobi Tsüngrem tsübu aser temenen sempa ta Yob tapu tetenzüklen shia angutsü. Asenoki Yob mangu, saka pa taküm otsü indang Laishiba nung azüngdang jangratema bilemer aser kanga akümtsüba adoker. Tsüngremi onsara temulung lemtet nungji, paibo temenen tatidang nung metsüktsü ta Tsüngremi tamang katetba nisungji Yob liasü. Ibaji atamata nisung masü aser atamata tamang masü. Aji oda, Tsüngremi pa dak onsara temulung lemtet nungji, nisungi Tsüngrem dak amangba tamang jenjang aser tashi sayuteptsü asoshi Tsüngremi Satan nem Yob akaba ajak bendanga agütsü. Yob akaba rongsentemji pa kinüngtsü, jabaso tenet, jala asem, san meyi tenet, ut meyi asem, alu alaba nashi pongchi 500, gado 500 aser kilirtem jenti liasü. Item ajak madak ano pa temang anema liasü. Aji oda, Yob nem Tsüngrem atakatemdaktsütsü aser Tsüngrem nungi piladaktsütsü asoshi item rongsentem ajakji samatsünüra samatsütsü asoshi Tsüngremi Satan nem tashi agütsü. Ibai asenok dak ataloktsü amai bilemdangdang, matalokdangyongi kanga tsüba aiter. Aji oda, Yob kinüngtsü dak alaka pa akaba rongsen ajak Satani samatsü saka Satani pa kinüngtsü dakbo mekongshi, kechiyong Satan tebilemba balaka liasü. Satani Yob akaba ajak samatsür külen, tesüsa Yob Tsüngrem nungi piladaktsütsü asoshi pa kinüngtsü amshi. Ashiko, par akaba ajak samar, la kinüngbo dena temang sünga komo agi zükbanger shirangdang, Yob kinüngtsüi la dang temeshi ama aser lar tsürabur nungi kenyongi tai memenadang aruba tetsür aser lai bilemba aser jembiba dang shitak liasü ta la mulungjang nung bilemer alitsü südi. Iba jagi, lai la kinüngbo dang pai amangba Tsüngrem atakatemtsü ashi. Pa akaba ajak samar, jala jabasoa kata mali aser par tembartemia pa dang aija jembiba mapang ka, pa kinüngtsüi dena pai amangba Tsüngrem atakatemtsü ashiba tensa tiaji Yob atema tatidang tulu liasü. Ajisüaka, iba ama timtem tekangshi nungang Yobi Tsüngrem angu. Satani pa matidangdang, pa akaba ajak Tsüngremi moatsü ta Yobi angateta liasü. Aji oda, pai tenla shitak agütsü. Pa ama par chirtema Tsüngrem meteta indaktsütsü asoshi kanga sarasadema anepaluba tsüraburji Yob liasü. Ajisüaka, iba ama temoatsü aser tamang jenjang nung ali tashia Yobi Tsüngrem indang tangashidang angashiba dak alala pa nük agi Tsüngrem mengui liasü. Manguba Tsüngrem dak amangba tamangji ibaji lir ta Yob otsü nungi asenoki jangjar. Atangji, asenoki timtem aser shisabolu aika ajuruogo. Ajisüaka, Yob-i ajuruba timtem aser tekangshi amabo asenok shingaia majurudangi alitsü. Iba ama timtem mapang asenoki Tsüngrem tebilemba mangatetter. Iba jagi Yob-ia pa shisa makaba agi Tsüngrem tebilemba mimbanga ayu ta kanga sasaa jembiba asenoki Yob 42 nung shia angur. Iba amaji, asenok timtemba mapang asenok shisamakaba o agi asenoki Tsüngrem tebilemba aser nükjidongji mangur. Atangji, kodang pa akaba ajak sama, Yobibo temenen memena aser Tsüngrem tenüngang moatsü. "Ni mangsa aru aser mangsa aotsü," ta pai ashi. Ajisüaka, Tsüngrem nükjidongbo aji masü liasü. Atangji, Yob mangsa aru saka pa mangsa mao, kechiyong Tsüngremi pa talila moatsü. Item timtem, tekangshi aser tatidang ajak aremzükteta takok ngur külenang, Yobi Tsüngrem dang ashi, "Kü narong agidang ni nü indang angashi, saka tangbo kü nük agi na angur." Yob 42:5. Timtem, tekangshi aser tatidang ajanga Tsüngrem angutsüsa aremzüktetba aser amangtetba tamang aser takümüji koda jangratemtsü. Alima nung alir asünungji, asenoka pei pei yari timtem aser tatidang ajurudang, Yobi Tsüngrem dang, "tangang ni na angur" ta ashiba o ji mamali.

OLEMSABANG

Asen lima tarutsü nükla aser teinyaktsü

~ Lanuchuba, Signal Angami, Dimapur

(Yashi adok nungi...)

32. Alima nung mazüngi aliba former India President aser scientist, saka parnok taküm Kati Koda Tsüngrem asoshi anogoshia mapang agütsüba ama asenoki angashir aser metetter, anungji inyaktetstü koka lir arungma khi shisadangi.
33. Iba lima nung asenoki asen sasa alir ama dang inyaker, jembir aser bilemer. Saka item ajakya asen Taküm Tsüngrem ajanga dang anir aser alir, saka aseni alia inyaker. Maneni Temeshi Lai tekong. (Isaia-1-2. "Angang, Oh anüngtem, tenarong agüjang, Oh alima, kechiyong Kibubai jembigo, ni techirtem mesütet aser intetdaksü, saka parnoki ni anema apuso.)
34. Alima nung aliba otsü, inyaktsü, jembitsü, melenshitsü yamala mesük jentiya, yangi tatishitsü, Olen ka, (Easy to dream but difficult to success). Ashi ama melamela pungmanger, saka kanga timtem jenti ajangshi-a dang takok angur.
35. Yangi tali rajema angatetstü aser angazüktsü kaji kokra Tsüngrem ji dang kibur ta Temeshi Lai ratet khar lemsar.
* (Yerimia 16-19. Oh Kibuba, kü tashi aser kü mitsa, timtem anogo nung kü jenokdak, ne dangisa alima tatem nungi kintem arua ashitsü, Ozü tsüraburtemi tiyazü dak alaka kecha senmang mamang, oda amajok osettem koba nung tajangzük maka.)
* (Hagai 1-9. "Nenoki jenti imla saka ajiang, aji tera dang liasü, aser aji nenoki kidangi bener aru, aser aji ni apudokadok. Kechiba? ta Temeranger Kibubai ashir. Kechiaser nenok nisung shia pei ki asoshi mazüngi inyakdang kü kibo teraksa nung lir.)
* (Yerimia 15-19. Anungji Kibubai yamai ashir, "Nai meyipdi süra, ni na yanglushitsütsü, aser na kü madang nokdaksü. Aser nai tamajung melen kechi senti lir aji jembira, na kü bang ama alitsü. Parnoki ne dangi meyiptsü, saka nai parnok dangi memeyiptsü).
36. Anungji Yimten yimsüser anirtemi nütsüng koda ania aotsü aser yimtsüng aser town koda renloka aotsü mapang tajung, joko sen(money) ajanga election mapang candidate tem aser nübür tem yangji manidaktsüla, joko terenlok asoshi tarutsü nükla nung development asoshi aser nübürtem mapa tabu palala ngua inyaktsü nükla nung longjemshidi.
37. Asen Arogo-a kanga tashi ita aotsü tangya mapang tajung, akok tashi kibok sem-ya, tanü kanga tongtipang kümoko. Asen nübürtem Koda melenshi aintsü, jajatsü, Tsüngrem metetdakja nübürtem aintsü, anitsü ajakji koma inyaktsü, nenoki alima ainba den apet ajak rajema lir. Anungji asen Arogo tanü putu den apet kibong rangben melehitsü aser election yim yim ano tanga yimya mapet mapatem, aji kibok sem ajanga dang akoktsü, anungji kanga tongtipang sudaktsüner. Yangi Temeshi Lai tekong (Mathi 25-35 nungi 36. Kechiyong ni ya-a liasü, aser nenoki kü nem chiyungtsü agütsü, ni tzüra-a liasü, aser nenoki kü nem jemdaktsü, ni aenersa liasü, aser nenoki ni aniok; mangsa alidang nenoki kü nem abendaktsü, ni shiranga liasü, aser nenoki ni semdang ni tepuokdak liasü, aser nenoki kü dangi aru.)
38. Asenok ajak iba lima nung tazüngla dang aru. Aser iba alima nung kodang toktsür odir, tazüngla dang aotsü. Ni metet, ni kodang iba lima toktsür, ni kü senmang, alima nung anguba konang nüngsang kecha bener maotsü. Saka iba lima nung alidang ni kechi inyak, tanela koyika kongshi, nisung koyika dang temeim sayutet, ibaji dang kü senmang asütsü aser iba rongsen aki malitetba senmang maparenji inyaktsüla. Tanü ni alima dang sangdongnüba-ya kanga dang temela, ni-ya kü dak kechi atalok aji masü saka ni-ya, ni kechi inyaktsü anogoshia aji shinerba lir.
39. Asen lima ajungtsü atema ni aser na melenshi nung dang asen lima tejakleni aotsü, anungji arung nokdakti, tatem nung tayongzukba Temeshi Lai tekong. (Mathi 22-36 nungi 37. "Tesayur, ozüng rongnung koba tulutiba asütsü?". Pai pa dang ashi, "Ne taküm ajak agi aser ne mulungsentsü ajak agi nai Kibuba ne Tsüngrem meimang).
40. Kodang pungmangji asangsang nung atalokter asen lima tajungba akümtsü aser aji asen pungmang shidak asütsü. Tatem nung ni amanger asenok ajak temoatsü sudakjang aji ni aser ozü kibong Sarasadem.

Iba Olemsabang nung lemsaba ken-o aser shisatsü ya iba ocet züluri bilemba ken-o ama tazünger angateta agitsü mepishir

Tawa 'Life Surge' sentongtem nung nisung 5000-i Khrista agizük



US nung 'Life Surge' sentong ka nung tangokba noksa nung angur.

September 20, 2025: US tesem balala nung 'Life Surge' sentongtem nung nisung 5,000 dak temai Khrista agizükogo; iba ya Tsüngremi mapa inyakba lir, ta lenirtemi metetdaksü.

"Life Surge-i linük tesem balala nung nisung meyrjang aika ayongdena Tsüngrem külemba den külemi Kibuba yimli atema senotsü aazüksü aser teimba bendenloksü atema tesayuba agütsür," ta parnok indang website nung shia lir.

Life Surge tentetsang, Joe Johnson-i nüngtugu sayutsüngirtem aser kentenertem aika jaoka item sentongtem nung shilem agidaktsür. Item sentongtem nung Khristan kentenertem-Priscilla Shirer, Tim Tebow aser Chris Tomlin nunger jaoker. Parnokisa business lenirtem-Shark Tank nungi Robert Herjavec aser The Profit nungi Marcus Lemonis nunger jaoka shilem agidaktsür.

Johnson-i, "Life Surge-i tamang jenjang indaktsüba den külemi pei wadang nunga takok angutsü atema tesayuba agütsür. Life Surge ya organization ka lir. Laishiba ajanga süngjang tangdaktsütsü

aser alima sünga arentsü atema shia lir," ta metetdaksü.

Taoba hopta Grand Rapids, Michigan nung Life Surge-i ayongzükba sentong ka nung nisung 5,000 dak tali aden. Parnoki Tsüngrem külemba den külemi aika angazüka liasü.

Life Surge sentongem nung o jembitsü atema Nick Vujicic, Duck Dynasty nungi Willie Robertson, football champion Tim Tebow, Hall of Famer Calvin Johnson, Auntie Anne tentetla Anne Beiler aser kaketzülur Ed Mylett nunger jaoker.

Life Surge-i, "Tsüngrem külemba den külemi tanga lenlatem nung tangazükba akaba ajanga sentong nung adenertem tamang jenjang ainba den külemi rongsen züintsü atema ajungshir. Business inyaktsüba, rongsen junga ketdangsütsü aser Tsüngrem yimli atema item rongsen amshitsü atema angazüker," ta metetdaksü.

Taoba hopta tatembanglen-a Michigan nung ayongzükba Life Surge sentong nung nisung 5,000 aden aser nisung 1,033-i Khrista nem taküm bendanga agütsü.

Life Surge Tir, Shawn Marcell-i, "Nisung meyrjang

aikati Tsüngrem külemba aser meyrjang ka dak temai Khrista agizükbaji Tsüngrem arakzüba agi lir. Grand Rapids nung atalokba ya asentenshi milak jangrutsü atema tetenzüker asütsü asoshi onoki sarasademer," ta ashi.

Marcell-i, Life Surge sentongtem ya mezüng 2021 küm tenzüka liasü, ta metetdaksü.

2021 küm item sentong ya yimti ana nung dang agiba sülen küm shia yimti teimba-teimba nung agia arur, aser 2024 küm nungbo yimti 30 nung item sentong agiogo.

Tawa Anaheim, California nung agiba sentong nung nisung 1,200-i Khrista nem taküm bendanga agütsü, aser ibaji sentong nung adenertem shilem 25 shi liasü, ta Marcell-i ashi.

San Francisco nunga Life Surge sentong nung nisung 1,400-i Khrista nem taküm bendanga agütsü aser Portland, Maine nunga nisung 1,100-i Khristan nem bendanga agütsü.

Marcell-i, "Kibubai tenyaba wadang tuluba ya pastor tem atema dang masü saka shishilembaba tesem nunga inyaktsü akok," ta ashi.

ANOGO ABEN TSÜNGREM DEN

KIBUBAJI NI ASOSHI TESANGWA

"Ni anema tepelatep Oh kü tsükchirtem, ni laoaka ni noktaksü, ni tammang nung menaka, Kibubaji ni asoshi tesangwa alitsü." Mika 7:8

Iba Tsüngrem O ya sepaitemi raraba oset tulu bener tsükchir metsübui amokmerena tongpangi aoba ama tamangertemi temenen mojing anema raratsü asoshi tasü itdaktsüba Tsüngremer ain tashi tulu tenangzükba lir. Atangji shi nunga süang, tanela nunga süang rara tongpangji kodanga temela masür. Rara nung teti tesama, teraksa, takoksa, tajepba lir.

Alima tongpang rara nung nokdakertemi koknerji pei amangba Tsüngrem dang sarasademer. Tsükchir injang, bomb nungi kümzükertemi ashir, "sayatenya nung Tsüngremi ni kümzük."

Asenoki aiben züzüa alir dang ashi asen tsükchir mojingi shi aser tanela nung anogoshi asenok laotaktsütsü, alangtaktsütsü merangbaji ngudarma? Asen madak takok angutsü asoshi pelatepbaji koda? "Ni anema tepelatep Oh kü tsükchirtem, ni laoaka ni noktaksü, ni tammang nung menaka, Kibubaji ni asoshi tesangwa alitsi" ta asenia shitetdima?

Temeim adianutem, aseni asen tsükchir temenen mojing tashiji shi agi dangbo makoktsu saka mapang ajak nung shibai asen taküm kumzüka ayur pa ain tashi bushidi. Kechiyong mojingi Tsüngrem dak alaka shinga metsübur. Asen tashi mait meteta "Kibuba ni ne tsütsü lir" ta shidi, pai kümzüktsü.

All India Congress on Church in Mission senden tembangogo

Nagpur, September 20, 2025

(Agencies): Maharashtra state kübok Nagpur yimti nung All India Congress on Church in Mission (AICOCIM) 2025 senden anogo pezünü tashi agia aruba sülen September 18 nü tembangogo.

Evangelical Fellowship of India (EFI)-i ayongzükba sentong nung India tesem balala nungi Khristan lenirtem aser Arogo nung lenirtem 400 dak tema aden. Iba senden nung Arogo dak sendakba tebilemtsü onük aika benoka o lemtepogo.

Senden tetenzük anogo nung India nung Arogotem dang timtem tensa ajangshiaka tamang jenjang manokshii Tsüngrem tenzüksü ayongzüka liasü.

Iba senden nungsa Khristan lenirtem dang ochishia alitsü aser Khrista kulisütsü ayongzükba den külemi peii jembiba ama taküm lia sayutsü ayongzüka

liasü.

Senden nungsa lenirtem dang pei asoshi mebilemi tangar tenzüka ajanga Khrista dak aliba temeim sayatsü ayongzüka liasü.

Technology dak sendakba nung Arogotem dang Artificial Intelligence amshiba nung 'telatet' ka alitsüla, kechiyong meimchir kati anepaluba ama AI jagi meinyaktettsü, ta metetdakja liasü.

India nung Arogotem dang timtem-toushi nem mekokdaktsütsü, ajisüaka ibaji maongka ama agia Tsüngrem tenzüksü ayongzüka liasü.

India nung Evangelical Arogotem tali longjemshir Khrista atema kulisüba mapa inyaktsü nükjidong nung iba conference ayongzüka agiogo.

Evangelical Fellowship of India (EFI) tentetba sülen küm 75 ajungba mapang nung iba senden ayongzüka agi.

England nung Arogo lenirtemi Gaza nung rara anentsü ayongzüker

September 20, 2025: Archbishop of Westminster, Cardinal Vincent Nichols densema Arogo nung lenir 30 dak temai Israel-i Gaza anema raraba ya anentsüla, ta tayongzükba agütsü.

September 18, 2025 nü Arogo nung lenirtemi sangdong ka ajanga, "2023 küm October 7 nü Hamas teloki Israel amakba sülen nungi tenzüka Israel aser Occupied Palestine Territory nung amajok nung taküm aika samaba, aika timtemba aser mangyimba ya ngua anogo shia lenirtem sasar," ta metetdaksü.

"Gaza nung rara anentsü, pua alirtem chioktsü aser teyari nüngdakbapurtem nem teyari agütsüba menokdangtsü atema onoki maneni takhangba agüja arudar. Onoki mepishiyonga metetsümonga rara manener, kangshia nisungtem meindoker, tai maket nisungtem azü

tokshitsür, kiojen raksatsür, nüngshi kiojen aser tekülem kitem raksatsür, tanurtem aya agi südaktsür," ta lenirtemisa metetdaksü.

"Tang ano Gaza City amakba ya ajanga meimchirtem ano taliba timtemtsü, chiyungtsü agi anüngba aser timtemba kibongtem maneni iba rara nungi ajentsüsa akümtsü. Rara tesashiba akümba ya amajok dang aser iba ya tangsa anentsüla," ta parnoki metetdaksü.

Israel nung Arogotemi maneni timtemertem yariba atema Arogo lenirtemi pelaba metetdaksü.

"Onoki alima linüktem dang tashi amshia nisungtem kümzüktsü aser kiojen raksatsüba nokdangtsü atema Israel rongshitsü onoki mepishir. Iba denji külemi teyari nüngdakbapurtem nem chiyungtsü, tzü, mozü aser nüngdak balala agütsütsü atema

mepishir. Sobaliba aser yimsü dak sendakba tesemtem wazüka ayutsüla aser akhümtsübütsüla," ta sangdong nung shia lir.

"Iba rara anentsü atema sarasademtsü asoshi Arogotem ayongzüker. Yirusalem nung yimjung atema sarasademjang (Tenüngsang Ken 122) aser Israel nung aliba Arogotem aser taneptsüba den taküm kümzüktsü atema inyaker ajak den amalitepa inyakdaktsüner," ta Arogo lenirtemisa ayongzük.

Iba sangdong nung sign süa alirtem rongnung Thyateira & Great Britain nung Greek Orthodox Archbishop Nikitas (Lulias), Churches Together in Britain & Ireland General Secretary Dr Nicola Brady; Churches Together in England General Secretary Bishop Mike Royal aser Baptist Union of Great Britain nung General Secretary, Rev. Lynn Green nunger densema lir.

AO OSHI ANGAZÜKDAK:**TANÜ ANGAZÜKTSÜBA OJANG****Teyongya**

(v) arema ataang ta ashiba (don't be anxious or not to be longing)

* Na Christmas arutsü kanga teyongya


Teyongyaba

(adv) ajurunüa mesüra ngunüa bilemba (longing, yearning)

*Arogo nunger jubilee amongtsü teyongyaba tulu liasü.



Tir Yimyim

OLONG PAITEP # 7277**TIPIEN**

1. Nisung jenti
4. Tsük rudenba
6. Temzüng tesashi
8. S _ _ _ i
9. Nisung telemsa
10. Anogoshi
12. Ajanga aor
13. Tsük rizingdak
14. Tebang nungi adokba
16. Süngdong tatembangtiba
17. Meputep

- (5)

- (5)

- (5)

- (3)

- (3)

- (4)

- (4)

- (3)

- (3)

- (5)

- (5)

LANGTSÜNGLEN

1. Tenük telong
2. Committee dang ajar
3. Yagi ki okdoker
5. Yim lenmang
7. Temoatsü keter meyipa aruba
11. Kanga junga menemba
12. Majinü
13. Tzüma nung senzüba

- (9)

- (5)

- (7)

- (5)

- (9)

- (7)

- (5)

- (5)

OLONG PAITEP # 7276 TELANGZÜBA**TIPIEN :**

2. Bangsemo, 6. Imt, 8. Jen,
9. Talila, 11. Aren, 12. Tsübo,
14. Alia, 16. Angati, 17. Odi,
18. Asü, 19. Sünglang.

LANGTSÜNGLEN :

1. Yipten, 3. Nüja, 4. Sangro,
5. Menen 7. Tulu, 10. Lasa,
11. Aben, 12. Tiyong, 13. Ajizük,
14. Aitsü, 15. Tasa, 16. Aika.

NAI-A YA METETTER

New Delhi Municipal Council (NDMC)-i September 19, 2025 nü world record ka yangluogo aser iba ya "10 Km long live canvas painting" atema lir. Sewa Parv kübok "Viksit Bharat Ke Rang, Kala Ke Sang" omen nung ajemdaker artists aser kaketshir 35,000 temai iba noksa yangluba nung shilem agia liasü. Iba sentong ya NDMC-i Triveni Kala Sangam aser Delhi University den yaritepa Kartavya Path Lawn, New Delhi nung ayonga agi. September 17 nü Prime Minister Narendra Modi tasoba anogomung nungtem nung iba sentong ayonga agi.

Tanur asoba anogo nung salem osang den noksa angati adokdaksünüra - Tenüng, Küm, School, Talidak & salem osang tejangja zülur, noksa (photograph - any size) ka den anogo 3 mesüra 4 jelia e-mail : tiryimyim@gmail.com nung yokang mesüra Tir Yimyim bureau tem nung agüjang.

Zubeen Garg asüba atema anogo 3 state mourning sangdonger

Guwahati, September 20, 2025 (Agencies): Nungtugu kentener Zubeen Garg asüba sülen Assam sorkari September 20 nungi September 22 tashi anogo asemnü state mourning sangdongogo.

"September 20 nungi 22 tashi state mourning sangdongogo. Iba mapang official entertainment, dinners, mesüra ceremonial functions kecha malitsü" ta Chief secretary Ravi Kota-i ashi.

"Zubeen Garg asüba atema Assam sorkar aoksar aser mangyimer. Pa ya singer, filmmaker aser cultural icon ka liasü" ta pai ashi.

"Asür Zubeen nem tetushi agütsüba sayua tang tagidak 'Seva Saptah' programmes thinena atar. Ajisüaka health camps, TB patients atema Nikshay Mitra support aser plantation drives agiyonga aotsü" ta Ravi Kota-isa metetdaksü.

Asür Zubeen'er kibong pa mang Singapore nungi beter arutsü atema Kahilipara kidang atateper. Pa tebu Mohini Mohan Borthakur ya Alzheimer's disease agi timtemer aser Zubeen kinungtsüi tarurtem pelaa agizüker.

"Dada (Zubeen) Alzheimer's disease agi

kangshir. Pa ya diabetic patient ka lir aser yashi osang angashiba sülen pa blood sugar level ajungket saka tanübo ibaji aziökog" ta Zubeen tebu tanubo Manoj Kumar Borthakur-i ashi.

Arishi küm 52 tain Zubeen Garg ya North East India Festival nung adentsü atema Singapore-i aoba liasü.

Zubeen-i nisung 17 den külemi yacht trip ka nung life jacket magii tzü awadang asü ta Assam chief minister Himanta Biswa Sarma-i ashi.

Honibarnü Singapore hospital ka nung Zubeen Garg mang autopsy agiogo.

CM Sarma-i ashiba agi pa Zubeen Garg mang agizüksü atema Delhi-i aotsü aser idak nung jagi Guwahati-i meina beter arutsü.

Külen, Singapore nung Zubeen Garg asüba atema North East India Festival nung Chief Organiser Syamkanu Mahanta aser Zubeen indang manager Sidharth Sarma na anema FIR aika benokogo.

Police station balala nung FIR benoka lir aser item ajak ya Criminal Investigation Department (CID) nem bushisüngdag asütsü agütsüogo.

Tripura Assembly-i Operation Sindoor pusema bangzüngtep

Agartala, September 20, 2025 (Agencies): Tripura Legislative Assembly-i September 19 nü Indian armed forces-i Operation Sindoor takok ngua inyakba atema congratulatory motion ka agizükogo.

Assembly Session tenzükdang Chief Minister Manik Saha-i iba congratulatory motion benoka liasü.

"April 22 nü Pakistan ajanga pusema kiralongrartemi Kashmir nung Pahalgam amakdang nisung 26 tepsetba aitsür. Iba tesempatsü mapa ajanga linük jashidaksü. Ni iba tatalokba khukhua aitsür aser tasür kibong ajak den mangyimba lemsateper" ta CM

Saha-i ashi.

India-i ibala inyakyim magizüksü aser mapa inyakerter aser parnok yarirtemi telangzüba angutsü ta Prime Minister Narendra Modi-i nangzüka bilemteter. May 7 nü Operation Sindoor tenzüker aser iba mapang Pakistan nung aliba kiralongrar teseptem amak aser kiralongrar aika tepset, ta Saha-isa metetdaksü.

Pakistani shelling sülen India-i missile strikes asüdag civilian nem timtem magütsü tongtipang military infrastructure raksatsü. Pakistan-i amak shia asen armed forces-i tasü itta aser indangindanga telangzüba agütsüogo. Prime Minister Modi

lenisüba kübok Operation Sindoor ajanga India-i pei sensotem kümzüka ayutsü tenangzüka aliba sayur, ta CM Saha-i ashi.

Army, Navy, Air Force, BSF, aser security agencies amalitepa mapa tajung inyakba atema tenüngsang agütsür aser India-i kiralongraba anema rara nung Operation Sindoor ya tongtipang alizüng ka lir ta paisa ashi.

Iba motion nung Tripura Assembly-i Prime Minister, Defence Minister, National Security Advisor, military leadership aser soldiers dang linük kümzüka ayuba atema tenüngsang agütsüba densema lir.

Aizawl nung Japanese language centre amenoktsü mepishir

Guwahati, September 20, 2025 (Agencies): Mizoram sorkari National Skill Development Corporation International (NSDCI) dang Aizawl nung Japanese language training centre ka amenoktsü mepishio.

Mizoram nung lanurtemi Japan nung oa mapa inyaksü maangka angutsü atema iba centre lapokang ta parnoki ashi.

Mizoram Youth Commission chairman Malsawmzuala Ralte-i New Delhi nung NSDCI CEO

Alok Kumar aser tongti ketdangsurtem den ajurutepe iba onük lemsatepogo.

Senden nung Ralte-i Mizo lanurtemi Japan nung caregiving aser nursing jobs inyaksü janrang aser iba nung Japanese oshi ashitsü nungdaker ta ashi.

Tesüiba nung state sorkari NSDCI den yaritepa Japanese language training atema lanurtem Noida-i yokogo. Ajisüaka Mizoram nungi lenmang talang asüba agi lanurtemi timtem ajurur ta Ralte-isa ashi.

Item timtem agientsü atema NSDCI ketdangpurtemi Aizawl nung aliba Mizoram Youth Commission office nung training centre ka lapoktsüla ta paisa ayongzü.

Alok Kumar-ia iba tebilemba pelaa agizük aser NSDCI-i asadangtsü atema telok ka Mizoram-i yoktsü ta nangzü.

Japan nung Mizoram nunger lanur 100 tema mapa inyakdar aser parnoki international employment atema sempet aliba jangatsür.

US-i ano temesepba mozü bena aliba rong ka makogo: Trump

Washington, Rongjui/September 20 (Agencies): United States tir Donald Trump-i ashiba agi, US nunger sepaitemi tang agi tasembenbuba temesepba mozü shibelena aliba rong makogo aser iba mapang rong nung mena alir asem tepseta liasü.

Tesandongbo mesangdong saka rara mena-a rong amakba atema Venezuela-i US aija United Nations dang item rongtem amakba ya bushisüngdang ayongzüka aliba mapang Hokolbarnü iba osang sangdongogo.

Pa indang Truth Social sabang ajanga Trump-i ashiba agi, rong tesüsabuba amakba ya US Southern Command kübok aliba tesem ka nung pa tetuyuba nung maka liasü. US Southern Command kübok South aser Central America aser Caribbean nung linük 31 lir.

"Rong nung temesepba mozü bena aliba indang itangitertemi osang tejangja agütsü aser iba rong ya America menentsütsü atema temesepba mozü shibelenba lenmang ka nung senzüa liasü," ta Trump-i ashi.

"International tzüyim nung iba rong amakba mapang narcoterrorists tebur asem tepsetogo. Rong amakba mapang US nunger sepai ka danga miyiru," ta paisa shisem.

Trump-isa, iba rong ya missile agi amakba indang minute ka talang video ka lemsatapa liasü. Rong nung mi adokba mapang iba video tembanga liasü.

Trump-i pai ashiba ya nongittsü atema kuli kecha magütsü, mesüra rong ya kong nungi apuso aser koba tesem nung amak iba indang osang kecha magütsü.

US-i temesepba mozü anema jenjang agitsü asoshi Venezuela tzüküm anasai international tzüyim nung warship tem aser item rongtem

nem teyari agütsütsü atema Puerto Rico-i F-35 fighters tem yoker aliba mapang tang iba rong ya makogo.

US-isa taoba mapang temesepba mozü bena liasü ta shia rong ana tashi makogo, koba Venezuela nungi apusoba liasü.

September 2 nü Trump-i, US military-i Tren de Aragua atema temesepba mozü shibelentsüba rong tilaka amakba sangdonga liasü, aser iba mapang nisung 11 tepset. Tren de Aragua ya South America kübok linük balala nungi ozüng alema inyaksangshiba telok ka lir.

Trump-i, asürtem ya narcoterrorists tem liasü, shirnoki United States-i temesepba mozü shibelener oya liasü, ta ashi.

Hombarnüa Trump-i, Venezuela indang drug cartel indang rong ka international tzüyim nung amakba metetdaksüogo.

Pai ashiba agi, iba rong amakba mapang nisung asem tepset aser parnok asem ya temesepba mozü shibelenertem atema inyakertem liasü ta jangjaogo.

Iba ita tanga tatalokba ka nung Venezuela sorkari US military aitsüogo. Venezuela indang exclusive economic zone nung ango apuba rong ka US military-i sota amokmerenba atema taitsüba ya benoka liasü.

US aser Venezuela na tsüngda tesendaktep kanga mejungi aliba mapang tang item rongtem amakba ajanga tesendaktep tamajungba kümshiogo. Trump administration-i tir Nicolas Maduro nongshia arudar aser pa ya Washington indang national security atema amokmeren ka lir ta sangdongogo.

Trump administration-i, temesepba mozü shibelenba atema aija Maduro atema senpet USD million 50 agütsütsü

nangzükogo.

Bodhbarnü Venezuela-i, Caribbean nung La Orchila asetkong nung anogo asem atema military exercises ka ayongzüka liasü, koba US-i amokmerenba atema telangzüba agütsüba ka liasü.

"Iba ya mesangdongba rara ka lir aser Caribbean tzüyim nung temesepba mozü shibelenertem asü masü mejangja saka item nisungtem tepsetba ngudar," ta Defence Minister Vladimir Padrino Lopez-i Hokolbarnü military exercise ka nung shilem agiba mapang ashi.

"Item nisungtem ya parnok temeden jembitsü maongka magütsüi tepseter," ta paisa shisem.

Kasa mapang nung Venezuela aser Latin America ajunga nung sorkar melenshitsütsü merangba atema Maduro-i Trump administration aitsüogo aser Washington dang sovereignty, yimjung atema temeden aser nüjiso akümtsübutsu ayongzükogo.

Paisa, Venezuela nungertem dang linük kümzüka ayutsü atema militia training nung adentsü mepeshiba den sepaitemi tekübokba jenjang nung aliba tesemtem nungi nüburtem nem prangbong aser hadir balala amshitsü atema training agütsütsü ta ashi.

Venezuela nung opposition lenir Henrique Capriles-ia, pai US-i par linüki amakba pu masemtsü ta shiogo.

Kasa mapang nung US nung ozüng yanglurtem aser rights teloktemi item rongtem amakba ajanga international temzüng ozüng aser nüburtem temeden nung aibelen asür masü iba indang ashishidar.

Human Rights Watch Washington director Sarah Yager-i ashiba agi, "US nunger ketdangsürtemi parnoki temesepba mozü shibelenertem ta aitsürtem odangbo metepsettetsü."

Russia-i drone aser missile amshia Ukraine amak; Nisung 3 tepset

Kyiv,Rongjui/September 20 (Agencies): Russia-i manger mesangwa tsüngda drone aser missile aika amshia Ukraine amak aser iba mapang nisung asem tepsetba den aika yirutsü aser kiojen aika raksaja liasü, ta Ukraine tir Volodymyr Zelenskiy-i Honibarnü ashi.

Russia-i tenzükbba rara ya tembangdaksütsü atema meranga inyaka arudar, saka ita tsüngda rara tamajungba küma odar.

Telegram ajanga Zelenskiy-i ashiba agi, Russia-i linük kübok tesem balala nung infrastructure, civilian manufacturing company tem aser nisung aliba tesemtem dak drone 580 shi aser missile 40 khaloktsü.

"Russia-i aonungsangwa Ukraine amak," ta Zelenskiy-i

ashi. "Iba amala inyakyim ajak ya military tsütsü tenüngdaksü masü saka Russia-i asa nüburtem amokmerentsü aser onok indang infrastructure raksatsütsü atema inyaker."

Kasa mapang nung Russia-i civilain tem amak ta aitsüba magizüki arudar.

Dnipro yimti nung missile kati nüburtem aliba ki ka maka liasü, ta Zelenskiy-i ashi. Dnipro nung nisung ka asü aser nisung 26 yirua liasü, ta regional ketdangsürtemi ashi.

Ano Chernihiv aser Khmelnytskyi na nunga nisung kaka tepsetogo, ta ketdangsürtemisa metetdaksü.

Arrtsü nung talangka pilar aliba yimtitem amaksü atema Russia-i parnok tasa melenshia mapa ka nung drone tem noklang aika yoker, koba küm

tetenzüklenbo ishishi dang yoka liasü. Ukraine-ia meyiper drone tem amshia Russia nung refineries, fuel depots, aser logistics hub tem maka arudar.

Kasa mapang nung Ukraine-ia, manger mesangwa tsüngda Saratov aser Samara tesem nung refineries ana maka liasü, ta Ukraine indang General Staff-i ashi.

"Refineries dak sendakba nung onok ket nung drone lir aser onoki item ya koda yanglutsü meteta lir. Anogoshia onoki drone kwi amshir iba dak keta lir," ta Zelenskiy-i osangbenertem dang ashi.

Maneni Russia indang Defence Ministry-i ashiba agi, parnok sepaitemi high-precision weapon tem amshia Ukraine indang military-industrial facility tem makogo.

OFFICE OF THE
KUSASANGER PUTU MENDEN
SETTSÜ VILLAGE, MOKOKCHUNG, NAGALAND

Ni, Mr. Moatemjen Longkumer, Chairman, Settsü Village Council, Akashvani Kohim den interview agiba koba 22nd Aug. 2025 nü agütsüogo, iba interview nung ni Settsü Village teratet tai ashiba atema ni kü tai nangzüker. Anungji ni kechi aibelena Settsü yim teratet shiogo, iba o ji meyiba agir. Kü aibelen atema sasa bilemer.

Akashvani Kohima nungi Settsü yimtsüngi arua interview agiba osang koba 22nd Aug. 2025 anogo nung agütsüogo aser social media balala nung prokshiogo, iba interview nung Settsü Village Council Chairman Mr. Moatemjen Longkumeri Settsü yim teratet tai ashiba atema Settsü Kusasanger Putu Mendeni pa 12th September, 2025 nü jaoka tasüngdangba ali. Pai Settsü yim tetezü tai ratettsüogo ta nangzük nung Kusasanger Putu Mendeni pa den nashi ka tebang senchi achi. Anungji iba sangdong ajanga Mr. Moatemjen Longkumeri interview nung Settsü yim tetezü ratettsüba ajak pai meyipa agiba metetdaksür.

Ni, Mr. Motemjen Lkr
Khuli asür:
1. Mr. Tiakaba Jamir
2. Mr. Imlikaba Lkr

1. Mr. Puryapang Lkr, Aola
2. Mr. Sariba Pongen, Tatar
3. Mr. Lanumeren Jamir, Tatar

Portugal-i Palestinian state ka agizüktsü



Lisbon, Rongjui/September 20 (Agencies): Australia, Canada, France aser United Kingdom nunger den longjema Portugal-ia Palestinian state ka agizüktsü atema sentong aliba sangdongogo.

Hokolbarnü sangdong ka ajanga Portuguese Ministry of Foreign Affairs-i ashiba agi, United Nations General Assembly (UNGA) nung Palestinian statehood dak sendakba nung high-level conference ka mamen tsünga anogo ka lia parnoki Deobarnü Palestinian state ya agizüktsü.

"Portugal-i State of Palestine agizüktsü ta Ministry of Foreign Affairs-i jangjashitsür," ta ministry-i parnok indang website nung zülutsü.

"Taruba hopta High-Level Conference magi tsüngda September 21, Deobarnü Palestine nunger atema state agizükba officially sangdongtsü," ta kasa sangdong ajanga metetdaksü.

Portugal indang Correio da Manha osang kaket ajanga ashiba agi, iba telemtetba tembanga merenem tsüngda linük Ato Kilonser Luis Montenegro-i tir aser parliament den ken o ashishia liasü.

Iba inyakyim ajanga Western European linüktem parliament tem nung küm 15 tashi o langtepa aruba tembangdaksüogo, ta Correio da Manha-isa metetdaksü. Iba onük ya linük Left Bloc political party-i 2011 küm mezüngbuba benoka liasü.

UN-i bushisüngdangba sülen Israel-i Gaza amakba ya kin ka meshi meshia samatsütsü merangba ka ta ngutetba sülen

anogo ishika lir Portugal-i iba osang ya sangdongogo.

2023 küm October ita nungi Gaza amak tenzükbba sülen nisung 65,141 süogo aser nisung 165,925 yirutsüogo. Iba den ano nisung meyirejang aika ki teraksa nung rema alitsü ta amanger.

Rara tamajungba küma aoba aser humanitarian crisis aser Israel-i Palestine nunger ali atsüngtsü amokmerenba mapang ka nung Portugal sorkari Palestine ya state ka ama agizüktsü atema tebilemba aliba July ita sangdonga liasü.

Hokolbarnü France tir Emmanuel Macron adviser kati ashiba agi, New York nung Hombarnü high-level senden ka ayongzüka amenba mapang Andorra, Australia, Belgium, Luxembourg, Malta aser San Marino nunger ajaki France den külemi Palestine ya state ka ama agizüktsü sentong lir.

Canada aser United Kingdom natia kasa jenjang agitsü tebilemba aliba lemsatepogo.

Parnok ya linük 147 den adentsü, shirnoki takümApril ita Palestinian statehood ya agizükatokogo.

Palestine tir Mahmoud Abbas nem taruba hopta video ajanga New York nung UNGA nung o jembidaksütsü atema lenmang lapoktsütsü asoshi vote agütsüba linük 145 rongnung Portugal-a densema liasü. United States-i pa nem visa magütsüba sülen iba jenjang ya agia liasü.

Nauru, Palau, Paraguay den Israel aser US nungeri iba anema vote agütsü aser linük troki vote magütsüi liasü.

Satwik-Chirag na China Open final-i iogo



Chirag Shetty & Satwiksairaj Rankireddy

Rongjui/September 20, 2025 (Agencies): India nung badminton tebur tarep asaya nung temaba jenjang nung aliba tarep Satwiksairaj Rankireddy aser Chirag Shetty nati Honibarnü China Open tebur tarep asaya semifinal koka final tongtetogo.

Semifinal asaya nung tenati Malaysia nung tarep Aaron Chia aser Soh Wooi Yik - 21-17, 21-14 agi minute 41 nung koka liasü. Tarep ana tsüngda tang agi 12benbuba asayaogo aser India nung tarep yagi pongubenbuba kokogo.

Taoba hopta Hong Kong Open Super 500 final tonga asayaba sülen Satwik aser Chirag na asayamung anabuba atonga final tongtetogo.

Paris nung World Championships quarterfinal nung ajurutebpa sülen tarep ana tsüngda tanabenbuba

asayaba mapang World No. 7 Satwik aser Chirag nati Malaysian nung tarep dang nung yagi tajungba asayateta liasü. World Championships quarterfinal nunga India nung tarep yagisa koka liasü.

Satwik-i backcourt nungi smash kanga ajanga amaba aser Chirag-i net nung kanga sangra asayaba ajanga Chia aser Soh nati yimya agi flat game kanga junga asayaba masayadaksü liasü.

Mezüngbuba game nung Chirag aser Satwik na 2-1 agi tejakdang sür tenzük saka mapang tatsüka dang lir 7-7 ta kasasa aküm. Chia aser Soh na mapang tatsüka atema point asem agi timba aküm.

Ajisüaka India nung tarep yagi telangzüba tajung agüja point maneni 10-10 ta kasasa aküm. Interval tashi nung Malaysia nung tarep

ya point ka agi tejakdang liasü, saka Chia-i aibelenba sülen Chirag aser Satwik na 12-11 agi tejakdang aküm.

Iba sülen India nung tarep yagi memenepdaksü asayayonga atu aser asaya 21-17 agi koka liasü.

Tanabuba game nunga India nung tarep ya 4-2 agi tejakdang ser asaya tenzük aser maneni tenati tajungba asayateta 8-3 agi tena tejakdang aküm. Interval tashi nung Chirag aser Satwik na 11-6 agi tejakdang liasü.

Ajisüaka Malaysia nung tarep yagi kanga meranga asaya-a point 11-9 aküm, saka India nung tarep yagi tena adena point mongudaksü asaya amokbanger asaya aser tanabuba game ya mezüngbuba game dang nungi tayongba 21-14 agi koka liasü.

Pakistan-i press conference nung shilem magitsü lemtet

Rongjui/September 20, 2025 (Agencies): Deobarnü Asia Cup nung India den semifinal masaya tsüngda pre-match press conference nung shilem magitsü atema Pakistan-i telemtetba agiogo.

UAE den taoba asaya masaya tsünga parnoki kasa telemtetba agia liasü. 6 ako nung agitsü aliba press conference nung shilem magiaka team ya sentong yanglur aliba ama ICC Academy, Dubai nung ghonda asem training session bo agitsü.

Pakistan team-i press conference nung shilem magitsü atema kechiba telemtetba agi, iba indang kuli tejanga memetet. Tang agi tanabenbuba Pakistan team-i asaya medenzük tsüngda osangbenertem den sensaksem nung shilem magir.

India den asayaba mapang

salem mesüdaksüba dak sendakba nung match referee Andy Pycroft den mangatettep ka aliba mapang tang Pakistan team-i iba jenjang agidar.

Maneni Pycroft ya taruba Super Four fixture atema match referee asütsü shimba sülen ken o ya tebenjaba kümogo. September 14 nü India aser Pakistan na asayaba mapanga Pycroft ya match referee liasü. Iba asaya nung toss asüba mapang Pycroft-i Pakistan captain dang salem masütsü tetuyuba agütsüba ajanga mepetmesü ya tenzük.

Iba sülen Pakistan Cricket Board-i Pycroft ya iba asayamung nungi agintsü mepeshia liasü.

Ajisüaka PCB-i Pycroft agintsü asoshi mepishiba ICC-i magizükba sülen ken o tamajungba küma liasü.

Iba ajanga Pakistan aser

UAE na masaya tsüngda ken o tebenjaba kümdakja Pakistan team Dubai International Stadium-i menor aru aser ghonda ka menomeyanga liasü. PCB ketdangsürtemi ICC den ken o ya sensaksemba mapang asayartem dang hotel toktsür maotsü tetuyuba agüja liasü.

Pakistan team management-i UAE den asayatsü asoshi toss masü tsüngda Pycroft den ajurutebpa sülen ano tanga ken o ka adok. PCB-i pa den ajurutebpa indang ola maliba video ka social media nung lemsatep, koba aikati aija liasü. Pakistan-i iba jenjang agiba ajanga ICC-i parnok anema jenjang agitsü asoshi asadanga liasü.

Team anaprongla kasa tesem nung asayatsü asoshi renemba mapang item tatalokba balala ajanga tensa mejungi kümdaktsüogo.

India junior tetsür hockey team sangdongogo

Rongjui/September 20, 2025 (Agencies): India tetsür team Australia junior women's team den asaya asem asayatsü aser iba sülen Australia Hockey One League outfit Canberra Chill den asayatsü.


India junior tetsür team atema asayar 23 shimba nung Jyoti Singh captain asütsü shimogo. India team Australia nung oa asaya pongu asayatsü.

Iba asayamung ya September 26 nungi October 2 tashi National Hockey Centre, Canberra nung asayatsü.

India tetsür team ya Australia junior women's team den asaya asem asayatsü aser iba sülen Canberra Chill team den asayatsü.

Iba asayamung ya FIH Hockey women's junior word cup 2025 atema renemshitsü asoshi tongtibang asütsü, koba Santiago, Chile nung December ita asayatsü.

Squad nung defender, midfielder aser forward tem temeyoktep lir shirnok Jyoti lenisüba nung asayatsü shiba



Jyoti Singh

taküm küm tetenzüklen FIH Hockey Pro League nung senior team nungi asayaogo.

Team nung goal keeper Nidhi aser Engil Harsha Rani Minz na asütsü aser defence nung Manisha, Jyoti, Lalthantluangi, Mamita, Oram, Sakshi Shukla, Puja Sahoo aser Nandni nung asayatsü.

Kasa mapang nung midfield nung asayatsü atema Priyanka Yadav, Sakshi Rana, Khaidem Shileima Chanu, Rajni Kerketta, Binima Dhan, Ishika, Sunelita Toppo aser Anisha Sahu nung simogo.

Forward nung Lalrinpui, Nisha Minj, Purnima Yadav, Sonam, Kanika Siwach aser Sukhveer Kaur densema lir.

Zinedine Zidane'er jabaso Luca Algeria nungi asayatsü

Rongjui/September 20, 2025 (Agencies): France nung nüngtugu asayar Zinedine Zidane'er jabaso Luca-i France nungi masü saka Algeria nungi asayatsü telemtetba agiogo, ta Algerian Football Federation-i metetdaksü.


Arishi küm 27 tain asayar shiba France indang youth level team tem nungi asayaogo, pa tang Spanish second division club Granada nungi asayar aser pai pa tebouer linük tenüng nungi asayatsü telemtetba agiogo.

"FIFA-i goalkeeper Luca Zinedine Zidane, Algerian national team nungi asayatsü atema temelaba agütsüogo," ta sangdong ajanga metetdaksü.

FIFA indang "change of association platform" ajanga iba telemtetba agiba ya Hokolbarnü sangdonga liasü. Pa French national team, nungi khen danga masaya asünung pa Algeria nungi asayatsü temsüa lir, koba tebouer linük lir.

North African nung aliba linük ya 2025 African Cup of Nations atema qualify süogo, koba December 21 nü nungi tenzük Morocco nung asayatsü lir,

Maneni World Cup qualifying Group G nunga



Luca Zinedine Zidane

parnoki point 19 ngua parnok temaba jenjang nung lir aser 2026 World Cup atema qualify asütsü asoshi Somalia den asaya akoktsü mesüra taruba ita Uganda den draw asütsü dang nüngdaker

Real Madrid youth academy nungi anitetba sülen Zidane ya Real Madrid indang reserve team nungia asaya liasü.

Pa 2017-2018 season leagu asaya tatembangbuba nung mezüngbuba main team nungi asaya liasü aser Real Madrid-i 2018 küm Champions League 13buba akokba mapang pa team nung third-choice goalkeeper liasü.

Zinedine Zidane ya Marseille nung aso, saka par kibong ya Algiers nungi km 250 shi pilar Bejaia kübok yimtsüng tila ka nungi lir.

BILEMDANGANG

"Tamang medeni mapa tasü."